



STINAPA TA INFORMA

FOI OKSIGENO TE ENTRADA

Ta ken no konosé su bos na radio? Carmo Cecilia, abo konos'é komo Bubui, ta tata, esposo i welo. Hopi di nos a lubidá ku e tabata mener di skol i diputado antes. For di 1995 e tin su propio emisora. Futbòl, lesa i kana ta su hòbinan. Bubui ta orguyoso di nos Boneiru pasobra lokual nos tin aki, nos no ta hañ'é ningun kaminda. E ta mir'é den su totalidat. Por ehèmpel, e laman limpi, e mondi seku pero ku na mes momentu tin su bunitesa. E naturalesa di nos isla segun Bubui ta algu ku nos mester kuida. Nos mes mester por probechá di dje mas tantu ku ta posibel. Esei lo por ta posibel ku kanamentu den naturalesa. Esaki ta laga nos sinti bon i e ta bon pa nos salú. Ounke ku e no ta masha amante di laman, e ta hañ'é algu masha bunita i ta komprondé e fasinashon ku otro hende i turistanan tin p'e. Bubui ta gosa e kampaña "NOS TA BIBA DI NATURALESA", ya ku esaki ta berdat den tur sentido di palabra. Pa kuminsá: e oksígeno, tal manera nos a siña na skol. Ademas e naturalesa ta un atrakshon tanto pa nos mes komo e turistanan. I no lubidá ku e ta un entrada pa nos ekonomia tambe. Bubui ta sigui splika ku na momentu ku komersio drai bon dor di bishitan-tenan, ku ta bini pa e naturalesa, nan komo emisora tambe ta haña entrada dor di propagandanan. Mas aleu Bubui ta di opinion si, ku no mester tin protekshon a todo kosto. Nos a drenta siglo 21 i Boneiru no por keda atras. Sino nos ta keda pegá den pasado. Nos mester haña e balansa nesenario. Na kada individuo ku ta na Boneiru Bubui kier a pidi pa kuida loke nos tin.

Skirbí pa Natalie Wanga.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru